

## Izaro Elorza Arregi

### Oñatiko alkatea

Oñatin jaioa, ezkondua eta bi alabarekin. Telekomunikazioetako ingeniaria da eta Proiektu Zuzendaritzako Europako masterra du. Urtebete beteko du aurki Oñatiko Udaleko alkatetzan. Bere zaletasunen artean, kirola-bereziki, korrika egitea-, musika entzutea, irakurtzea, sukaldaritzza...



#### « Alkatetzan ia urtebete bete duzularik, zein da denbora horri buruz egiten duzun balantzea? Espero zenuena da?

Egia da ia urtebete pasa dela kargua hartu nuenetik. Esan dezaket hilabete hauek lan handikoak izan direla, alde batetik, 2019an martxan zeuden proiektuei jarraikotasuna ematea eta etenik ez egotea nahi genuelako; eta, bestetik, gu geu ere, antolatzen eta martxa hartzen aritu garelako lehen hilabeteetan, bai udaleko zereginetan, baita partaide garen beste erakundeetan ere. Orain, 2020an sartuta gaudela, esan dezaket dinamika onean ari garela, eta pozik nagoela taldeak duen indarrarekin, gure arteko koordinazioarekin, eta, orokorrean, egiten ari garen lanarekin. Beraz, esan dezaket hilabete hauek niretzat behintzat oso positiboak izaten ari direla.

#### « Lehenetsuneko zer proiektu ditu mahai gainean Oñatiko alkateak?

Proiektuen zerrenda luzea daukagu eskuartearen, eta, hein batean edo bestean, guretzat denak dira garrantzitsuak.

Batzuk herrian bertan egitekoak, eta, beste batzuk, aldiz, barne mailakoak. Hala ere, batzuk aipatzearen, esan genezake denbora eta kostu aldetik Kiroldegiko, Natur Eskolako eta Araotzeko ostatuko obrak ditugula esanguratsuenak. Irisgarritasun faseei dagozkienak eta kale argiztapen proiektu berriak ere eskuartearen ditugu, baita Elorregiko komunaren inguruko lanketa ere. Aurrekontu partehartzaileetatik 2020an exekutatzeko irten ziren proiektuak ere hor daude. Eta, agian hain agerikoak ez izan arren, gure bizitzetan duten eraginagatik, uste dugu oso garrantzitsuak direla parte-hartze araudia, merkataritza plana, turismo plana, HAPOa. Eta, nola ez, hor daude I. berdintasun planaren diagnostikoa zein II. Planaren garapena.

#### « Oñati denboran egonkor mantentzen ari den populazioa daukan herri bat da. Oñatik definituta dauka zein den udalerrirako nahi duen hazkunde eredia?

Oñatiko demografiak 2001etik %0,4ko igoera izan du; guztira, 2001-

2019 tartean 623 biztanle gehiago gaude herrian. Egitura aldetik esan genezake zahartzen ari dela, pertsona gazteen kopurua %1,5 igo bada ere, zahartzeak %4,2 gora egin du. Hau ez da Oñatin bakarrik gertatzen ari den zerbait, baizik eta orokorrean dagoen joera bat. Beraz, hurrengo urteetan ez da espero demografia hazkunde izugarririk, baina bai demografiaren zahartze bat.

#### « ULMA Taldean ere kezkatzen gaituen galdera bat. Badirudi Oñati okupazioaren muga dagoela industriarako lurzoruari dagokionez. Zure iritziz, nola eragin dezake horrek udalerriraren garapen industrialean? Neurriak hartzen ari dira?

Justu oraintxe ari gara HAPOaren (Hiri Antolamendurako Plan Orokorra) lanketarekin, eta lehendabiziko pausoa, gaur egungo egoera aztertu eta aurretik zegoen 2006ko arau subsidiarioen arteko konparaketa eta diagnosi bat egitea izan zen. Ondorioen artean hauek daude: arau horretan jasota zeuden lursail industrial ugari garatu gabe geratu direla, eta

industriaren eta enpleguaren hazkunde edo bilakaera aztertuta, ez dela lursail berrien beharrik aurreikusten. Bai, ordea, garatu gabe gelditu zirenak exekutatzeko. Beraz, lanketa horretan jasotakoaren arabera, ez du ematen gaur-gaurkoz ditugun datuekin eta aurreikusi daitekeenarekin, epe ertain batean arazorik egon beharko lukeenik gure industrien euren jarduna aurrera eramateko.

#### « Gure inguruan langileak lantokietara garraiatzearen ondorioz gure aldeak gainezka daude. ULMA urrats txiki batzuk egiten ari gara Mugikortasun Jasangarriko programekin sentsibilizatzeko. Oñatiko Udala ari da alor horretan lanean?

Udalak bere egunean egin zuen mugikortasun planean oinarritzen gara egiteko gelditu diren hobekuntzak edo proiektuak gauzatzeko, eta proposamen berriak daudenean gidalerro bezala izateko. Azken urteetan hainbat lan egin dira herritarrek kotxea ahalik eta gutxien erabili eta mugikortasun jasangarri baten alde egiteko. Legealdi honetan

ere bide horretatik jarraituko dugu, jasangarritasunaren alde apustu eginez. Horixe izan zen landu genuen gaietako bat udalean sartzeaz bat enprekin izan genituen bileretan. Beharrezkoa ikusten da bi aldeok hau lantzea: enpresetan erraztasunak ematea -ULMA egiten ari den bezala- eta udal mailan bide beretik segitzea. Alde batetik, azpiegiturazko proiektuak ditugu martxan, izan irisgarritasuna, autobus geltokien azterketa edota lan lekuetara doazen bidegorriak; eta, bestetik, kontzientziario kanpainekin edo programa zehatzekin jarraituko dugu.

#### « Azkenik, dakizunez, Begira ULMA Taldeko bazkide eta langile guztiei zuzendutako aldizkaria da; Oñatiko alkateak mezuren bat helarazi nahi al die?

Udalaren izenean eskerrak ematea ULMA osatzen duzuen langile guztiei, izan ere, mundu mailan erreferente izan eta Oñati mapan jartzeaz gain, gure herriaren aberastasuna eta egoera ekonomiko egonkorra, hein handi batean, gure ehun industrialari -tartean, ULMAri- esker

baita. Etorkizunera begira, berriz, erronka berriak izango ditugula esango nuke, ez soilik lanpostuak mantendu, berriak sortu edo lehiakorak izaten jarraitzeko, egiteko erak aldatzen eta egokitzen joateko ere bai, iraunkortasunaren alde apustu eginez, gure ondorengo ongizatea bermatze aldera, besteak beste. Denon artean egin beharreko lana da. Udalaren, enpresen eta herritarren lana da.

**«** Azken urteetan hainbat lan egin dira herritarrek kotxea ahalik eta gutxien erabili eta mugikortasun jasangarri baten alde egiteko. Legealdi honetan ere bide horretatik jarraituko dugu, jasangarritasunaren alde apustu eginez.